



11. oktober 2022

UKA 2022/119

Kalaallit Nunaanni pinerluttulerinermi inatsisip allanngortinneqarnissaanut inatsimmut missingiutip (akuersissuteqaqqaarnissamik tunngavilimmik pinngitsaaliilluni atoqatiginninneq pillugu aalajangersagaq) Kalaallit Nunaanni Namminersorlutik Oqartussanit akuersissuteqarnissaa pillugu Inatsisartut aalajangiiffigisassaattut siunnersuut.

(Aatsitassanut Inatsisillu Atuutsinneqarnerannut Naalakkersuisoq)

Siumup pingaartilluinnarpaa inuiaat inatsisitigut illersugaanerisa qulakkeersimajuarnissaa. Taamaattumik Siumup eqqartuussiveqarnerup aammalu pinerluttaalisitsinerup pitsanngorsartuarnissaanut nukittorsartuarnissaanullu peqataassaaq peqataajuassallunilu.

Nunatsinni kinguaassiuutitigut peqquserluuteqartarnerit amerlasoorujussuunnerannut oqariartuutaasartut misissuinerit assigiinngitsut takutittaraat Siumumi ajuusaarnartutut isumaqarfigaarput. Taakkualu peqquserluuteqartarnerit ajoraluartumik takutittarpaat meerannguanit utoqqarnut kinguaassiuutitigut peqquserluttarnerit pisartut – tamannalu annernarluinnaqqissaarpoq, taamaammallu ajornartorsiutip millisaaviginissaanut, ajornanngippallu nungutinnissaanut inuiaqatigiittut iliuuseqartuartaqartugut Siumumi isumaqarluta.

Ukiopassuanngortuni pinaveersaartitsineq annertoq inuiaqatigiinni ingerlassimagaluarlutigu kinguaassiuutitigut peqquserluuteqartarnerit ataatsimut katikkaanni malunnaatilimmik appariaateqarneq ajornerat assorsuaq uggornartuuvoq, akiuiniarnermimi inuppasuit nukippasullu atornerqartarput ilaatigut soorunami iluatsitsiffiusartumik. Pinaveersaartitsinernilu taakkunani nikallujaallutik suliaqartut suliaqartarsimasullu Siumumiit aammaarluta qamannga pisumik qutsavigiumavagut.

Qujanaqisumik kinguaassiuutitigut peqquserluuteqartarnerit akiorniarnernanni ukiuni kingullerni annertuutigut suliaqartoqartuarpoq, akiuiniarnermilu ukkatarinninnerup suli nukittorsarneqartuarnissaa pingaaruteqartutut Siumumi isumaqarfigaarput, kinguaassiuutitigummi innarliisarnernit malunnaatilimmik appariaateqarnissaat angutserlugu suliaqartuartaqaratta.

Pinerluttulerinermi inatsisip ilusilerneqarnermigut pitsaasutut Siumumiit isumaqarfiginaraluartoq, siunnersuummi matumani anguniarneqartut eqqarsaatigalugit pinerlineqartartut aammalumi pinerlineqarsinnaasut ullumikkornit suli inatsisitigut illersorneqarnerunissaat anguneqarsinnaammat Siumumiit toqqissisimanarnerusutut isumaqarfigaarput.

Maannamut pinngitsaaliilluni atoqateqartarnermut inatsisitigut aalajangersarneqarsimasut tasaanerupput timimik akiuusinnaajunnaartitsilluni pinngitsaaliinerit, siorasaarnermik assigisaannilluunniit sakkooarluni pinngitsaaliinerit, ukiukitsunik pinngitaaliinerit, inummik akiuusinnaassuseqanngitsumik aammalu imminut illersorsinnaassuseqanngitsumik pinngitsaaliinerit ilaalu ilanngullugit.

Siunnersuutilli massumap pinerlineqarsinnaasut allat suli inatsisitigut illersornerusinnaagai naatsorsuutigineqarsinnaasooq Siumumi isumaqarpugut, tassami siunnersuutip massumap atuutilersinneratigut kinguaassiuutitigut iliuuseqarnerni tamani illuatungeriit tamarmik kissaataannik tunngaveqarnissap ersersinnissaa pingaaruteqarluinnarpq. Tassalu illuatungeriit nammineq



kajumissusertik tunngavigalugu atoqatigiinneq pilersissavaat, taamaattoqanngippat pinngitsaaliinerusaaq.

Pinngitsaaliineq tassaavoq inunnut navianaatilimmik pinerluuteqarnerit ilungersunarnerpaat ilaat, taamaammallu tamassumap pinnginnissaanik pitsaasunik malitassaqarnissaq aalajangersagaqarnissarlu sakkussaapput pitsaanerpaat. Taamatuttaaq pitsaasunik inatsisitigut sinaakkuteqarneq eqqaarsaatigalugu, inuiaqatigiit qaammarsaavigineqartuarnissaat pingaaruteqarluinnartooq Siumumi isumaqarpugut, soorluttaaq inatsisissami matumani anguniarneqartumi tamanna aamma kajumissaarutigineqartooq.

Siumumiit taamatut isummersuuteqarluta, suliap inatsisinut ataatsimiititaliami suliarineqarnissaa inassutigaarput.

Anders Olsen, Siumut.